



歸先生文集卷之十八

吳郡歸有光著

門人王執禮校

雜著

興安伯世家

興安伯徐祥興國大治人初爲陳氏萬戶至正辛丑
江州附隸傳友德軍與從征黃梅東勝數有功洪武
八年由西安護衛馬軍小旗除金吾左衛百戶從征
松花江黑山乃兒不花塔灘里陞副千戶庚辰燕兵
起祥首議帥師奪九門克居庸關陞燕山左護衛指

揮僉事尋改左衛指揮僉事援兵懷來破雄縣按兵
月樣橋追敗大軍於漢州復敗之於真定出劉家口
破大寧敗齊尚書軍於鄭村塢陞指揮同知尋陞北
平指揮僉事破廣昌辛巳克蔚州攻大同大戰於白
溝攻濟南陞指揮同知壬午敗長圍軍於雄縣敗大
軍於夾河大戰藁城復敗之攻順德至彰德破保定
西水寨敗援軍癸未破東阿東平汶上至鳳陽奪河
南橋小河塢鳳凰山與大軍戰於齊眉山敗漕軍於
靈璧復敗大軍於營寨取泗州盱眙盱渡江入金川門
是歲冬封功臣 皇帝制曰昔我 皇考太祖高皇

帝峻德廣運格於皇天光天之下用集大成亦有熊
羆之士不貳心之臣庸作股肱心膂左右弼成悉視
功載懋之官賞列爵崇報萬世有辭 皇考升遐建
文即位自絕於天改更成憲屢造大愆圖任側媚咸
劉宗親禍延於朕朕不獲已以爾有衆底天之罰咨
爾都指揮使徐祥事朕藩邸首獲奸宄內奪九門外
攻居庸追戰漢州真定應援永平走遼東兵從下大
寧捷於壩上白溝大戰遂取滄州威深夾河藁城西
水小河靈璧每有功能克堪用武輔成大勳疇咨於
衆惟良顯哉是用授爾奉天翊衛宣力武臣特進榮

祿大夫柱國興安伯食祿一千石子孫世世承襲乃與爾誓除逆謀不宥其餘若犯死罪爾免二死子免一死以報爾功於戲位不期驕祿不期侈其益遜乃志弘乃量以持乃祿位朕無忘爾功爾亦無忘朕訓常以暇逸思其艱難常以富貴思其貧賤欽哉惟克永世永樂二年興安伯祥卒孫亨嗣十一年亨從駕北征至紅山嘴敗瓦剌於蒼唯峽二十年至渠列兒河天城等地二十一年至陰山二十二年至半邊山西路奉駕南還宣德二年與黔國公征交趾失利正統九年征兀良哈三衛出界嶺口河北川敗賊師多

鹵獲賜誥券進封興安侯興安侯常守關中侯弟愷居京師一日天子集諸武臣及子弟馳騎命懸本爵牙牌奪得公者與公奪得侯者與侯愷直馳豐城侯奪其牌豐城初不覺既而請於侯侯顧愷解還之人多其不競天順四年興安武襄侯卒子賢嗣爲興安伯賢卒子盛嗣盛卒從弟良嗣良祖母故小妻也良父既生而其祖繼娶定襄伯女及是郅氏之孫與良爭襲朝議以郅氏初嘗適人法不得爲正嫡良竟得襲良年五十猶日於大中橋受雇爲人汲水比都督府求爲興安伯嗣乃謝其鄰而去良僉南京中軍

都督府事奏請給其祖父母誥命尚書楊一清議以私親不宜干大宗不許嘉靖癸巳良卒子勲嗣乙未勲卒先是賢以跛足免朝叅革去半俸劉瑾時革去折色二百石才得食祿三百石折色五百石迄良之世不能復也祥季子麟金吾衛指揮同知洪武末胡騎臨城內外震恐麟挺身出閉午門亦以功世官南京

贊曰予至南京嘗館於興安伯家興安有兩鐵券及讀鐵榜板榜累朝 誥命嗚呼盛矣是時興安伯良已歿門第蕭然所謂世祿之家蓋名存而實亡矣

天子方隆繼絕之義國初元勲以廢起者四五家當此時興安伯勲齎千金入京以求為嗣至質宅於人吾不知其何以也

記壬午功臣

壬午封爵之稱有四曰輔運曰翊運曰靖難曰翊衛或因或革而三等之祿又各自有差次其間或襲或降或止其身又有不同焉凡封爵有三十嘉靖時存者成國鎮遠永康武安泰寧保定隆平興安應城忻城襄城新寧平江一公六侯六伯云

公二

靖

成國朱能 淇國丘福

五千二百石 二千五百石

附舊爵增祿一

輔原封

曹國李景隆

加一千石

侯有十四

靖

永康徐忠 武安鄭亨 成陽張武 同安火真

一千二百石

運

武城王聰 泰寧陳圭 保定孟善 鎮遠顧成

靖

輔

靖

靖安王忠 永春王寧 武定郭亮 隆平張信
一千石 一千二百石世伯 一千石世伯

安平李遠 思恩房寬

世伯

八伯世指揮使

伯有十四

衛

雲陽陳旭

武康徐理

興安徐祥

應城孫巖

一千石

都指揮同知淵之子

忻城趙彞

信安張輔

襄城李濬

新寧譚忠

運

衛

順昌王佐

平江陳瑄

新昌唐雲

富昌房勝

一千石世指揮使

世指揮使

世指揮使

世指揮使

運

兵部尚書

廣恩劉才

忠誠茹常

九百石世指揮同知

一千石不世

附

驃騎將軍都督僉事張興

驃騎將軍都指揮使張成

書安南事

安南自黎利立國之後世脩職貢正德十一年安南王黎暉為其下陳暠所弑國人立其兄子諲陳暠逃據諒山累年討平之嘉靖元年莫登庸立諲弟應而

專有其國會 天子新即位詔賜外夷使者至龍州
界移告諒山衛無所荅知其國內亂未達而返其後
登庸鳩殺黎慮立己子登瀛僭號改元而黎諲死清
源府國人奉其子寧爲世孫十五年 天子以皇子
生諭少傅賢頒詔高麗安南時安南不賓貢者二十
一年兩廣大臣歲歲牒問未得其要領 天子慨然
欲發兵誅之而雲南人亦奏安南人武嚴威犯邊於
是少傅賢言 天子繼天立極君主華夷安南負固
爲逆久不來庭無所逃於天討 太宗皇帝之兵
分兩道而入蓋安南地域東起廣東之欽州迤西

廣西之左江至臨安之元江爲界而廣西龍州所必
由之道憑祥州則其要害也西則由臨安經蒙自縣
河底之蓮花灘至其東都四五百日程耳大司馬九伐
之法賊賢害民則罰負固不服則侵放弑其君則殘
蠹茲三苗實負三罪上千天討自速滅亡聲罪正名
可傳檄而定矣明年黎寧臣鄭惟僚潛走京師奏言
登庸逆亂之故乞正天討譯問惟僚言往者憑祥州
關隘梗阻海東長慶高平安平歸化安西沿邊州峒
土官以非安南故所往來不爲假道惟僚挾宗圖奏
章入商舶中隨風飄至占城餘二年始得來見 天

子議者以朝廷方欲興師而使者忽至恐有詐請遣人到邊牒驗之而置惟僚錦衣衛密室中惟僚奏去國日久不知國內存亡牒間恐泄事機賊將生計曠日彌月是絕世孫之望阻國人之心而顯惟僚不為國之罪也逆徒文書多於憑祥上下凍龍州昔惟僚帥師攻諒山使黃公顯迎朱埴朱埴者故國王所遣告急使也可問憑祥州人某年月果有諒山衛官黃公顯將兵會上官李珠攻上琴行廬社以水牛黃牛謝李珠可驗鄭惟僚黎氏臣也 天子於是再下廷臣議決攻討之計

馬政職官

周禮太僕下大夫二人漢百官表太僕秦官掌輿馬其屬有六廐及龍馬閑駒橐泉駒駉承華諸監邊郡六牧師苑皆屬之後漢志太僕掌車馬天子出奉駕上鹵簿用大駕則執馭其屬有考工車府未央廐而漢故時六廐省為一廐後置左駿令別主乘輿御馬故牧師苑分在河西六郡者皆省唯漢陽有流馬苑以羽林郎監領永初初越雋置長利高望始昌三苑益州置萬歲苑犍為置漢平苑晉太僕或置或省宋齊惟郊祀權置太僕執轡事已即罷梁置太僕卿與

太府少府爲夏卿太僕漢爲中二千石梁列爲十二卿至後魏第二品最高品矣後與九卿並第三品大氏以後品皆第三時南北二朝南朝有廢置北朝無廢置隋煬帝省太僕驛騶署入殿內省尚乘局漢以來太僕置官本末今述其略其詳具諸史唐六典載太僕卿之職掌邦國廐牧車輿之政令總乘黃典廐典牧車府四署及諸監牧之官屬少卿爲之貳凡國有大禮大駕行幸則供其五輅屬車之屬凡監牧所通羊馬籍帳則受而會之以上於尚書駕部以議其官吏之考課凡四仲之月祭馬祖馬步先牧馬社六

典定於開元中其書訪周官叙太僕之職爲詳別有尚乘局亦具六典及百官志宋初有飛龍廐天廐坊騏驥院後置羣牧司廐牧之政皆出於群牧而太僕但掌天子五輅屬車后妃王公車輅元豐改官制群牧之職並歸太僕元祐初令內外馬軍專隸太僕直達樞密院不由尚書省崇寧初詔太僕寺不治外事如舊制渡江後省寺入兵部其詳具宋史元太僕寺掌阿塔思馬又有尚牧監尚乘寺具元史余觀漢表志及唐六典太僕不徒奉乘輿自天子之六閑外至諸苑皆隸之武帝別置奉車駙馬都尉始分乘輿之

事唐因隋尚乘局內廐別設官 本朝太僕寺統群
牧監後廢監令民養馬而太僕專領之內廐自有御
馬監惟或乏馬於太僕取之而鹵簿儀仗陳設大駕
駕部與環衛司也皆不復關於太僕南京太僕寺故
留京若行太僕寺苑馬寺亦並建無所統一遼東山
西陝西有行太僕遼東陝西又有苑馬甘肅有行太
僕而舊亦有苑馬苑馬之設遼東則有永寧監清河
苑涇河苑陝西長樂監則有開盛安定廣寧苑靈武
監清平萬安苑皆前代善水草之地邊於北狄苑馬
之設最盛唯不領於太僕與古異今具洪武以來官

制職分於後

馬政祀祠

周禮春祭馬祖夏祭先牧秋祭馬社冬祭馬步馬祖
天駟也房爲龍馬又周禮夏禁原蠶天文辰爲馬精
龍與馬同氣古之聖人非通天地萬物之理其孰能
與於此是以制祭祀而國家受福百物皆昌也祭以
剛日用少牢皆於大澤具隋志及唐開元儀祝皆曰
天子遣某官某昭告云余觀秦趙史記自益爲朕虞
佐舜調馴鳥獸其後費昌仲衍世爲御有功列爲諸
侯而造父幸於周穆王得驥溫驪騂騶耳之駟獻

之穆王穆王使造父御西巡見西王母樂之忘歸而徐偃王反造父御穆王日馳千里以歸造父由此封於趙城其後奄父爲宣王御而非子以善養馬孝王封之犬丘豈以栢翳爲虞而子孫世世善御能息馬哉上古聖賢皆神靈通於萬物不可以後世測度也穆王造父之事竒矣夫社祀以勾龍稷祀以棄若造父非子豈今所謂先牧耶太僕秦官主奉車又掌馬事意秦制蓋有所本抑周禮軼而不備不然何前世御者皆能善馬也太僕職兼奉車與馬其出於古非秦官明矣洪武六年太祖幸滁學士宋濂從太僕

寺卿唐元亨請置廟祠於滁永樂間北京太僕寺在通州故建祠如滁其神曰先牧曰馬祖曰馬社曰馬步曰司馬凡五神位每歲春秋天子遣太僕少卿主其祭而天下凡養馬處處皆有祠遂爲通祠弘治二年學士王鏊爲建廟記其文曰國家太祀郊祭外則社稷社祭土稷祭穀皆民所恃以生國之大事在戎戎政之大在馬馬之生養蕃息在人而亦有人力所不及則馬神祀固宜居社稷之次天文房爲天駟辰爲馬詩云既伯既禱周禮春祭馬祖夏先牧秋馬社冬馬步 皇明建都古冀馬之所生而通州爲地

高寒平遠泉甘草豐彌望千里世傳 太宗靖難與
南軍戰於此若有相焉者因 詔作馬神廟於其地
在今通州之北地曰壩上鄉曰安德旁為御馬苑凡
二十所春秋二仲則太僕少卿往主祀事其辭曰
皇帝命某官某致祭往必陞辭返必廷復其嚴如是
歷歲滋久梁棟圯墜藩級蹙圯沮洳穢翳人畜不禁
行禮至結茅以蔭已乃撤去風露橫侵星月仰見心
虔跡褻相顧惋歎而皆重於改作弘治八年太僕卿
臣禮始具以聞且乞立石題名以示永久詔可以屬
役於通州等二十五州縣財因歲登力因農隙始九

年之三月十年二月告成湧殿穹堂長廊邃廡齋廬
庖湍完舊增新周垣外繚重門中閱啓閉以時過者
祗肅是役也始前太僕卿臣禮臣鉞成之者今太僕
卿臣琮而少卿臣質臣珩臣纓實相之寺丞臣珪縣
丞臣鐸寶啟其事御馬監太監臣春等實攸其費於
是翰林侍讀學士臣鏊再拜稽首書其事於碑古者
王畿千里出車萬乘 國初賦地於民而牧之國與
民蓋兩利焉及今百有餘年其地固猶在乎然則取
之於民則為擾牧之於民則又擾是何哉方今 聖
仁在位百度具舉而尤垂意焉政琮等既協力以崇

神祠則在人者其將次第而脩復乎銘曰旣旣國馬
于甸之野渙焉如雲駢焉如雨有廟言言在潞之陽
始誰作之自我 文皇敢有不虔天駟煌煌瞻彼雲
漢造父王良有崇有圮其自人如神斯降祥人維致
喜昔在衛文亦有魯僖心維塞淵思亦無期功以才
興亦以情毀琢石饒詞爰告無止 世宗虔事上玄
嘉靖中四時遣祭皆以卿行 今上自如常祀 馬
神祠在通州北四十里安德鄉鄭村壩今太僕寺中
亦有馬神祠寺官到任及朔望如土地祠致拜而已
無祭禮祭則於通州壩上壩上諸房養馬御馬監掌

之以桐乳 天子之玉食資焉

余既述祠祀如前後問知 皇朝故事者謂洪武二
年築壇於後湖先是詔禮官考定其儀曰周官以四
時分祭馬祖先牧馬社馬步先牧始養馬者其人未
聞馬社始乘馬者世本曰相士作乘馬馬步神之灾
害馬者也隋因周制祭以四仲月唐宋不改今定春
秋二仲月甲戌庚日於是遣官行禮爲壇四壇用羊
一豕一幣一其色白籩豆各四簠簋登象尊壺尊各
一樂用時樂獻官齋戒公服行三獻禮祝曰維神始
於天地之物而馬生於世牧養蕃息馭而乘之閑廐

得所歷代興邦戡定禍亂咸賴戎馬民人是安朕自
起義以來多資於馬摧堅破敵大有功焉稽古按儀
載崇明享爰伸報本以昭神功永樂十三年行太僕
卿楊砥請立馬神祠於蓮花池 上命翰林院考古
今儀式翰林院言古者春祭馬祖夏祭先牧秋祭馬
社冬祭馬步之神 國朝南京止祭司馬之神於是
設馬祖及司馬五神位每位用羊豕帛各一儀制准
南京洪武本祭四神而永樂儒臣乃謂南京止祭司
馬之神不應失攷如是疑後湖蓋始議至滁陽而復
改尚未有攷也天順五年 天子復於壩上馬房命

別自建祠而以元旦冬至及 聖節遣內侍主其祭
光祿寺具品物不領於祠官

歸先生文集卷之十九

歸先生文集卷之十九

吳郡歸有光著
門人王執禮校

雜著

夏氏世譜

禹之先出於黃帝而別氏姓姒氏其後分封以國為
姓有夏后氏夏今陝州夏縣禹所都因以為有天下
之號者也殷湯時有夏革衛有夏戊夏期而陳別有
夏氏以王父字所謂少西氏媯姓之後也楚漢之際
張耳為代王以趙王弱國初定自傳之夏說為相國

歸先生文集卷之十九雜著

守代漢易太子夏黃公避秦而隱留侯招之出卒定漢嗣夏寬從申公齊魯間受詩事武帝為陽城內史以廉節稱夏恭蒙陰人習韓詩孟氏易光武拜為郎中遷泰山都尉從學者常千人門人私謚曰宣明其子牙舉孝廉鄉人稱為文德先生而夏勤官至司空夏馥陳留圉人與范滂張儉同被詔捕為黨魁變形入林慮山中夏統者不事司馬晉傲睨王公賈充見於洛水而異之夏方者少喪父母負土為墳虎豹皆來馴擾其傍為五官中郎將除高山令統方皆會稽永興人也夏孝先桐廬人嘗廬墓有野火延燒近墓

孝先悲繞號慟鳥獸群以毛羽濡水撲滅之宋夏遇并州榆次人為武騎將軍與契丹戰歿子守恩天雄泰寧武寧節度使守贇同知樞密院事贈太尉謚忠僖公守贇子隨都總管沿邊招討副使贈昭信軍節度使謚莊恪公並寵顯於真宗仁宗之世任西北邊帥夏承皓江州德安人以右侍戰歿於契丹子竦同中書門下平章事侍中鄭國公謚文莊公子安期龍圖閣學士兼侍讀知延州竦有文學才術而安期亦以才居邊任夏執中袁州宜春人姊宋孝宗成恭皇后以恩澤官奉國軍節度使提舉萬壽觀加少保循

守禮法不以外戚干政初秦莊襄王母夏太后宋成
恭皇后 國朝 武宗莊肅皇后夏氏爲皇后者三
人 莊肅皇后洛陽人也宋末夏士林爲簽書樞密
院事夏貴爲樞密副使兩淮宣撫大使貴竟以兩淮
歸元爲淮西安撫使而元軍入皖城通判夏猗死焉
國朝高皇帝起兵定天下夏氏爲元帥總管功在
太常者五六人刑部尚書夏恕洛陽人而夏元吉爲
戶部尚書輔佐五朝當世以爲名臣贈特進光祿大
夫太師謚忠靖公忠靖公湘陰人其先自會稽徙也
蓋禹之後別爲姓以百數有扈有男斟尋彤城褒費

杞繒辛冥斟戈此其章章者禹以明聖爲天下山川
神主聲教訖于海外故自周武王封杞後亡而越句
踐興其後有閩越王無諸粵東海王搖至餘善滅國
而繇王股等猶爲萬戶侯而桀子淳維居於北陲世
爲北狄主雖在蠻夷皆爲君長則禹之遺烈遠矣初
禹崩會稽杼封以爲世祀二十餘世至勾踐及無疆
滅於楚楚盡取吳地至浙江越以此散爲君王居海
濱無疆之長王去瑯琊無諸保泉上漢既郡兩粵而
姑粵區句章吳門餘後黃林餘不甌鄧猶皆越之餘
也故夏之著者在會稽今吳郡夏氏當方谷珍之亂

其家殲焉亮方孩母抱以逃後適海虞雙鳳里朱氏
因冒其姓夏氏之老姑自滇南來尋訪其家獲亮告
以其故亮始知其先居崑山之太倉曾祖曰景芳祖
曰君實父曰文通亮後以子貴封中書舍人贈中憲
大夫太常寺少卿葬馬鞍山四子昂杲杲晟昂字孟
陽以薦入中書授河南永寧縣丞送徒天壽山坐事
謫隆慶復召爲中書舍人杲字仲昭少爲諸生事訓
導盧從龍太守姚善死國難株連黨與及從龍諸生
逃散杲獨不忍去人高其義舉進士選翰林院庶吉
士 太宗皇帝愛其書日被顧問 上嘗以其名視

云日當居上改昶爲杲故世以昶字皆作杲云 仁
宗皇帝在青宮與舍人朱孔易秀才凌晏如並直東
華門時尚書蹇義學士楊士奇贊機密杲預焉詔杲
書北京宮殿榜會脩釋典集朝士及天下名僧書
上親第杲書第一授中書舍人直文淵閣進考功主
事正統中纂脩 仁 宣二廟實錄書御覽諸書及
皇陵碑知瑞州入爲太常寺少卿遷太卿後累加
正議大夫資治尹中奉大夫杲善寫墨竹妙絕一時
海外朝鮮日本暹羅諸國爭重購之爲人灑落薦於
倫誼初昂戍隆慶杲亦從坐杲徒步往省脫杲於難

後言于院長薦昂授中書舍人昂居翰林二十餘年
其子文振復在中書父子兄弟世掌絲綸當世以為
榮而吳中稱富貴孝友之家必曰夏太常 賜葬迎
鐘浦昂二子欽字克承葬齊禮坊二子寅辰錦字德
文一子津字時濟鄉進士知象山昌化二縣病還昌
化民遮道泣留之津有孝行嘗作夏氏譜泉子三人
鉞字德威承事郎以蔭讓其弟太常既老善娛奉之
極亭館花木之盛爲人有義俠風三子景淵景濂景
湘鐸字文振以字行泉進其書 景皇帝命入中書
景官舍人大理寺右寺正六子景澄景瀾景潤景洪

景淮景清鎡字德年蔭補南京光祿寺署丞葬白馬
涇三子景瀄景灝景瀚景杲字季明子一人錡無後晟
字季章子一人鎰二子天恩天宥寅之孫璋復爲族
譜今序止太常之孫其後支庶並詳於譜圖
歸子曰余譜夏氏有夏后氏而又有夏氏蓋后之省
也世謂周成王封夏公余考之不然二王之後杞爲
公疑夏公即杞公也世代綿邈子孫播散四方不可
復紀惟越守禹塚祀會稽千餘歲不絕故言江南之
夏繇會稽近之矣

歸氏世譜

歸氏其先胡子國於汝陰魯昭公十四年胡子始見于春秋而昭公母夫人歸氏也當是時荆楚憑陵中夏暴橫江淮間胡小國不能自立與江淮沈頓相隨服屬于楚嘗從楚伐吳敗于鷄父其後亦時從諸侯侵楚定公十五年楚子滅胡以胡子豹歸太史公以其微不為世家言故莫知其得姓所始於古帝王功臣何祖也胡既亡子孫散在他國或以國氏或仍歸姓歸姓歷秦漢魏晉至于隋無紀唐天寶中崇敬舉博通墳典科對策第一為史館脩撰代宗幸陝召問極言生人疲弊當率天下以儉富國迺可以用兵大

曆初使新羅贈遺無所受當世傳其清德崇敬治禮家學尤為諸儒所服累遷翰林學士兵部尚書封餘姚郡公謚曰宣子登事後母篤孝舉孝廉復以賢良對策拜右拾遺抗論裴延齡及為起居舍人十五年不遷淡如也順宗時為皇太子諸王侍讀獻龍樓箴以諷憲宗每咨政理登所對中外傳以為讜言官至工部尚書封長洲縣男謚曰憲子融元和中進士歷官翰林學士御史中丞劾奏湖南之進羨錢者官至兵部尚書太子少傅封晉陵郡公會昌中少儒者朝廷禮典多本融議融五子仁晦仁翰仁憲仁紹仁澤

皆舉進士至達官仁澤以第一人至列曹尚書觀察使子藹亦舉進士拜侍御史爲朱全忠所怒貶登州司戶叅軍同光初爲尚書左丞吏部侍郎太子賓客致仕藹子係復舉進士第一人官至禮部侍郎而後至于宋無紀元有曰暘者至順初舉進士同知潁州年少精敏能擊斷河南有大賊殺行省官爲亂劫暘守黃河口暘守死不從由是名聞天下拜監察御史入朝順帝加獎賜以上尊累官刑部尚書集賢學士國子祭酒蓋自秦至于唐而得宣公一人傳子至孫自唐至于元而得集賢一人以歸氏數千年來所紀

者如此亦可慨矣或曰盛德必百世祀原歸氏所起者微故其後莫顯夫史之闕久矣唐虞之際十有一人者垂益夔龍不知所封咎繇之後英六無譜咎繇垂益夔龍豈其微者哉或曰歸氏自亡國後世居於吳未嘗遠徙故吳中相傳謂之著姓然自宣公累世貴盛爲吳人而集賢寔居汴梁不知汴梁是何別也今他處亦頗有歸氏而惟吳中爲多吳中之歸皆宗宣公有光之所可知者始自湖州判官罕仁罕仁而上十五世至太子賓客藹其譜失亡罕仁生道隆居崑山之項脊涇今大倉州也道隆生廉訪使德甫德

歸氏世譜後
甫生子富子富以洪武六年徙崑山治城之東南門
子富以下崑山之族可得而詳焉其別者居吳縣或
居太倉或居嘉定或居湖州其在長洲者居婁門或
居沙湖在常熟者居白茆

歸氏世譜後

吾歸氏之譜既亡吾祖之高祖始志其里居世次而
曰高祖罕仁唐太子賓客藹之十五世孫宋末任湖
州判官以此知吾家本於宣公而不得其世次名諱
不可譜也又曰曾祖道隆自號居士祖德甫仕河南
廩訪使天下亂失官稱提領生考子富洪武六年徙

崑山之東南門此其所可攷者其他行事莫詳也吾
祖之高祖諱度字彥則少喪父而所生母亦已先亡
事嫡母甚孝處兄弟有恩弱冠坐事亡命走西南萬
山中經辰水麻合山烏江紫梢蠻峒數處幾死常有
神人護之自播州轉入丁山丁山之神夜來與語其
貌甚偉曰吾姓褚氏導以如巴中巴人以為神相與
敬愛之居九年赦歸時洪武三十年也將渡江又有
戴笠者若云江不可渡是日大風諸渡者盡溺死以
此獨免永樂中以人材徵辭不就初高祖兄弟三人
高祖獨有七子子孫最繁衍矣高祖治家有法年老

益精明每鷄鳴子墻方巾布袍揖而受事及暮復命亦如之諸婦小有言即曰兄弟所以失愛者皆婦人之爲也使謝過乃已作遺訓數百言又爲書云吾少聞先考之言吾家自高曾以來累世未嘗分異傳至于今先考所生吾兄弟姊五人吾遵父存日遺言切勿不能亡也爲吾子孫而私其妻子求析生者以爲不孝不可以列于歸氏其所以訓如此亦可以見吾歸氏之紀雖不詳而家法相承之厚也吾祖之曾祖諱仁字克愛爲人剛毅必行己之志不爲勢力所怵以高年賜冠服吾高祖諱璿字文美例受承事郎生

而竒偉磊落然自尊奉每飯未嘗不鳴鼓也好飲酒恒至達旦賓客往往自失亡去高祖儼然無倦容明有天下至成化弘治之間休養滋息殆百餘年號稱極盛吾歸氏雖無位於朝而居於鄉者甚樂縣城東南列第相望賓客過從飲酒無虛日而歸氏世世爲縣人所服時人爲之語曰縣官印不如歸家信高祖同時諸昆弟並馳騁因爲武斷者或有也高祖與諸弟出常乘馬行者爲之避道其後縣令方豪年少負氣士大夫多爲所陵然曰惟歸氏得乘馬餘人安可哉高祖歿於正德三年有光已生三年矣吾曾祖諱

鳳字應韶曾祖美姿容恂恂愛人長者治尚書精誦雖奏厠不輟成化十年中南京鄉試北上人有居京師者其家寄遺以百金曾祖中途遇掠盡以已貲與之竟完全以歸其人弘治二年選調城武縣知縣務休息其民兗州太守龔弘御史嚴明少當其意顧獨愛曾祖然曾祖雅不喜爲吏每公退輒擲其冠曰安用此自苦亡何以病免歸曾祖母林氏世宦族祖鍾爲山東叅政有名曾祖母歸歸氏事上撫下曲有恩禮宗黨稱之曾祖嘗夜臥聞枕間有鐘鼓聲及卒柩上有聲如鸛曾祖母未幾亦卒有光受命於吾祖而

其述止此時嘉靖之二十年也

先妣事畧

先妣周孺人弘治元年二月十一日生年十六來歸踰年生女淑靜淑靜者大姊也期而生有光又期而生女子殤一人期而不育者一人又踰年生有尚姪十二月踰年生淑順一歲又生有功有功之生也孺人比乳他子加健然數顰蹙顧諸婢曰吾爲多子苦老嫗以杯水盛二螺進曰飲此後姪不數矣孺人舉之盡嗜不能言正德八年五月二十三日孺人卒諸兒見家人泣則隨之泣然猶以爲母寢也傷哉於是

家人延畫工畫出二子命之曰鼻以上畫有光鼻以下畫大姊以二子肖母也孺人諱桂外曾祖諱明外祖諱行太學生母何氏世居吳家橋去縣城東三十里由干墩浦而南直橋並小港以東居人環聚盡周氏也外祖與其三兄皆以貨雄敦尚簡實與人妯娌說村中語見子弟甥姪無不愛孺人之吳家橋則治木綿入城則緝纊燈火熒熒每至夜分外祖不二日使人問遺孺人不憂米鹽乃勞苦若不謀夕冬月鑪火炭屑使婢子爲團累累暴階下室靡棄物家無閑人兒女大者攀衣小者乳抱手中紛綴不輟戶內洒

然遇僮奴有恩雖至箠楚皆不忍有後言吳家橋歲致魚蟹餅餌率人人得食家中人聞吳家橋人至皆喜有光七歲與從兄有嘉入學每陰風細雨從兄輒留有光意戀戀不得一留也孺人中夜覺寢促有光暗誦孝經即熟讀無一字齟齬乃喜孺人卒母何孺人亦卒周氏家有羊狗之病舅母卒四姨歸顧氏又卒死三十人而定惟外祖與二舅存孺人死十一年大姊歸王三接孺人所許聘者也十二年有光補學官弟子十六年而有婦孺人所聘者也期而抱女撫愛之益念孺人中夜與其婦泣追惟一二彷彿如昨

餘則茫然矣世乃有無母之人天乎痛哉

請
勅命事畧

先人諱正世爲吳中著姓先曾祖諱鳳中成化甲午鄉試選調兗州城武縣知縣先祖諱紳縣學生爲太常卿夏昺之孫壻昺以文學爲一時名臣詩書之業以故世有承傳先祖家教尤嚴先人蚤遊縣學屢試不第而有光後出有名及舉鄉試先人遂謝去先祖於諸父有分獨退讓處其薄先祖以高年篤老先生與伯父年亦皆逾七十侍側日忻忻然如少年兒子皆不知其老也日閉門讀書每自喜以爲有所得性

坦率未嘗與人有所爭與里中結社有香山洛社之風社中人尤敬其德稱其別號曰岫雲言如出岫之雲無心也歲壬戌有光八上春官不第還先人遂以是年卒年七十有八又三年始登第而先人不及見矣悲夫以有光之困於久試祖父皆以高年待之而竟不及及先人之方歿而始獲一第曾不得一日之祿養所以爲終天之恨也有光仕宦既不遂獨幸以建儲詔得推封此亦可少慰人子之情子萬一敢叙其大畧上之史館

先妣姓周氏世家縣之吳家橋先外祖諱行太學生

家世以耕農爲業外祖始遊成均而後其從孫大禮始舉進士爲河南左叅政先妣河南之從姑也先妣年十六歸先君聰明勤儉生伯姊與有光先後僅一年先妣比歿有光與姊年七八歲已教之小學及女紅甚習常程課不少借先人則怡怡然也不幸年二十六卒所生弟妹又三人伯姊嫁河東都轉運使王三接其在禮部時封伯姊爲安人有光獨久不第而先人春秋高先妣墓木已拱有無窮之感也常默默自媿其姊云

先妻魏氏光祿寺典簿庠之女太常卿謚恭簡公校

之從女也恭簡公爲當世名儒學者稱爲莊渠先生云先妻少長富貴家及來歸甘淡薄親自操作時節歸寧外家以有光門第之舊而先妻未嘗自言以爲能可以自給及病妻母遣人日來省視始歎息以爲姊何素不自言不知其貧之如此也嘗謂有光曰吾日觀君殆非今世人丈夫當自立何憂目前貧困乎事舅及繼姑孝敬閨門內外大小之人無不得其懽人以爲有德如此不宜天歿而生一子甚俊慧又天僅存一女天道竟不可知矣

繼妻王氏吳中王氏多自以爲太原之後然實無攷

獨先妻家譜系最明遠有承傳曾祖益讀書吳淞江上時海虞大理寺卿章公格及吏部左侍郎葉文莊公皆當世名卿以文字往來爲締姻好屬再世壯男子死家又苦役先妻少喪父妻母教之甚脩謹年十六來歸不失婦道撫前子愛甚已子前子死時哭之悲病遂亟其聰明慈愛蓋天性也魏氏生時有光方年少爲諸生及王氏方鄉舉家益貧歷歲歲北上辦裝及下第之窮愁有光自歎生平於世無所得意獨有兩妻之賢此亦釋家所謂隨意眷屬者也今蒙恩封贈例當封妻前一人與最後一人而恩詔乃

許移封今妻費氏亦願推讓王氏則泉壤之下亦被希世之曠典矣

予自臨安辭謝臺省還過弁山午飯後舟中無事因書此當即遣人赴京受勅雖簡畧數語下筆輒爲哽咽人生之痛無以加矣書里涇張氏妾事

嘉靖三十四年冬倭賊退屯海上予得間返安亭故廬時寇氛尚未息而三四年來吳中之士女被戮辱者多矣亦徃徃有女子之義烈者予方欲咨訪論著之而未及也去安亭二十里近夏駕浦地名里涇有

婦張氏其夫死夫之弟攘其田廬逼嫁之婦遁逃兄所夫弟偵其兄出劫以如所許陸氏者爲婦婦即絕食陸氏婦女老嫗日與居說之不荅十月晦竟縊死予嘗讀漢史稱荀采事采爲陰瑜妻十九而寡父更許妻同郡郭奕父僞病篤召女扶抱載之至郭氏女命張四燈與奕相見因勅左右辦浴入室拵戶以粉書扉云尸還陰陰字未成而縊今婦之死於陸氏與采同然采高陽天下名族荀慈明之女知書學問爲是易也田里之婦區區不失其志難矣哉命也婦不死於賊邂逅迫脅與遇倭者何以異婦之夫弟歸其屍葬於故夫之旁以成還陰之志予友廣平尹張德芳書來告予予問之里涇人良然遂書之

歸先生文集卷之二十

吳郡歸有光著

門人王執禮校

行狀

吳純甫行狀

先生姓吳氏諱中英字純甫其先不知其所始曾祖某自太倉來徙崑山祖某父某母某氏先生生而奇穎好讀書父為致書千卷恣其所欲觀里中有黃應龍先生名能古文先生師事之日往候其門黃公奇先生留與語貧不能具飯與啜粥語必竟日還先生

以故無所不觀而其古文得於黃松爲多先生童髻入鄉校御史愛其文封所試卷檄示有司他御史至悉第先生高等開化方豪來爲縣縣有重役召先生父先生以書謁方侯侯方少年自謂有文學莫可當意得書以爲奇引與游甚歡其後方侯徙官四方見所知識至吳中者必以先生名告之然先生意氣自負豪爽不拘小節父卒遺其貲甚厚先生按籍視所假貸不能償者焚其券好六博擊毬聲音婦人擁妓女彈琵琶歌謳自隨散其家一千金久之廼更折節曰矜飾顧不屑爲齷齪小儒篤於孝友急人之難大

義落落人莫敢以利動令有迎館先生者欲有所贈遺見先生竟莫能出一語先生之策嘗以事置對令閱其姓名疑問之乃先生弟先生不自言也與其徒攷古論學庭宇灑掃清潔圖史盈几觴酒相對劇談不休雖先儒有已成說必反覆其所以不爲苟同後生有一善忻然如已出亟爲稱揚里中人聞之輒曰吳先生得無妄言耶某某者皆稚子何知也然往往一二年即登第去或能自建立知名當世而吳先生年老猶爲諸生趨學宮揖讓博士前無愠色年四十四始爲南都舉人先生益厭世事營城東地藝橘千

株市鬻財自給日閉門不復有所往還令兒女環侍
几傍誦詩而已少時所喜詩文絕不爲曰六經聖人
之文亦不過明此心之理與其得於心者則六經有
不必盡求也如今世之文何如哉嘉靖戊戌試禮部
不第還至淮先生故有腹疾至是疾作及家二日而
卒是歲四月某日也距其生成化某年月日得年五
十有一娶陸氏蚤卒無子側室某氏生子男入原長
女三人長適工部主事陸師道其次皆許聘予于先
生相知爲深十年前嘗語予曰子將來不忘夷吾鮑
子之義吾老死不患無聞於後矣於是先生弟中材
大畧其志意可攷而知焉

封中憲大夫興化府知府周公暨配晏恭人行

狀

公姓周氏諱書字存中其先汴人宋靖康末扈蹕臨
安至貴一公始家崑山之吳家橋貴一生思聰思聰
生士賢士賢生顯顯生明是爲耕樂翁有行誼學士
吳文定公銘其墓曰剛直君子生四子長諱璿是爲
樂清翁次諱璣諱玉諱衡衡太學生家世孝弟力田
至太學始用儒雅登上舍然兄弟並以賢雄鄉里吳

家橋在邑南千墩浦上直橋並小溪以東獨周氏兄弟居之殆成聚落無他族其南惟有吳翁云樂清生四子公其季也母張氏公甫冠爲晏翁壻雖在賓館猶東西家也每入定省父母以其出壻憐愛之至則喜見顏色少有志於學爲博士弟子益自砥礪以病不克卒業其病痰喘竟歲不瘳即瘳月復繼作然性孝友恭謹不以病廢禮居母張碩人之憂號毀骨立諸兒爲之勸解哭愈哀惟見相隨擗踊則稍慰曰兒能助吾哀自是病日益深樂清晚得末疾不能行又時時欲行公旦夕扶掖令誦兒讀書於傍以更代樂

清謂能將迎其意喜曰吾有子有孫死不恨矣兄弟友愛甚篤不忍一日相離仲兄嘗病脹輿舁至家晨夕不去側湯藥必躬調以進其他內外宗黨待之曲有恩禮見耆年特加敬讓人有犯輒自反曰吾其有以召之也置不與較自爲博士弟子不遂居常悒悒故尤勤於教子延師禮費不少靳而規範之嚴諸子循循未嘗識人間佻宕之習仲子憲副君自束脩至於貴顯所至必與天下知名之士遊而居官律已當世士大夫稱之繫公之教也其爲興化知府政成上計得 貤封如其官金緋輝煌然惴惴不敢當自憲

副君起進士出守郡至持憲節專制海南積官十餘年依然故廬無一瓦一椽之增焉仲兄之歿也公已病亟力疾往哭甚哀公自是遂不復起矣恭人生晏氏父諱安母趙氏性端重寡言笑與公伉儷五十年相敬如一日公自壯歲嬰病迄於壽考左右調護之功爲多諸子自幼學時公出外即爲標識書額自督課之其勤儉出於天性至貴紡績未嘗釋手晏翁蚤世諸孤纍纍皆庶出恭人相其母撫之極有恩晏家業日圯趙母生養死葬悉出恭人又與公謀置田守翁夫婦冢春秋祀焉公生于成化壬寅六月六日卒

于嘉靖丁未十二月十七日得年六十六恭人生于成化甲辰六月二十七日卒于嘉靖丁未閏九月十一日得年六十四子男四大倫太學生大禮即憲副君大賓大器女二適姚舜卿凌天惠孫男六之夔之望之豐之畢之榮之旦女九戴九有徐欽張士弘李廷芳張士中其壻也餘幼初憲副君之在興化也數遣人迎養公與恭人相謂曰居官以潔已愛民爲本至彼有甘旨之累且往來輿馬皆民力也魚羹脫粟田中獨不能自具耶遂堅卻不往及 誥封命下憲副君即馳疏於 朝乞 恩歸養其畧云自守郡以

來感激 聖恩未嘗不矢心勵行以圖報効於萬一
不意構成疾病雖勉強備位而精神消耗日不能支
伏念臣之父母皆年踰六十亦時患病相去二千餘
里山海阻隔音問不通誠恐旦暮客死重貽無窮之
恨臣嘗以是具達而巡按御史等仰體 朝廷用人
之意慰留調治遷延至今臣憂思愈甚乃不得已昧
死哀鳴於 闕下臣切惟爲國忘家人臣之道而亦
臣生平之所自誓也然病廢無用於時則聽其偃仰
於父母之傍以親旦夕之養實 國家教人以孝之
道况若臣病即死則鞠躬盡瘁臣之分願已畢若乃

反復淹綿坐靡廩餼臣罪益深亦非 朝廷用人之
意矣伏望 陛下俯察微臣 勅下吏部容臣致仕
幸不即填溝壑則扶杖進屨之年皆歌詠太平之日
也疏奏 朝廷勉留之尋有廣南之 命不欲行公
與恭人強之上道甫視事而恭人之訃至蓋三月之
間再涉鯨波望國而公之訃又至憲副君以是自傷
云某之先妣與公同祖不幸蚤逝嘗念少時之母家
群從諸舅每見輒哀憐慰藉爲談先妣生平相與淚
下至今使人有戚亡涓陽之感而憲副君又同學相
知愛故以公恭人之遺事使予論次因謂憲副君既

國朝先朝文集 卷之二十一 六 兩金堂
以卓然有立於世而推周氏之淳德淵源蓋有所本
以附之家乘云

通議大夫都察院左副都御史李公行狀

曾祖茂

祖聰贈通議大夫都察院左副都御史

父玉贈承德郎吏部驗封司主事再贈奉
政大夫吏部驗封司郎中三贈通議大夫
都察院左副都御史

公諱憲卿字廉甫世居蘓州崑山之羅巷村以耕農
為業通議始入居縣城獨生公一子令從博士學山

陰蕭御史鳴鳳奇其姿貌曰是子他日必貴吾無事
閱其卷矣先輩吳中英有知人鑑每稱之以為瑚璉
之器公雅自脩飭好交名俊視庸輩不屑也舉應天
鄉試試禮部不第丁通議憂服闋再試中式賜進士
出身明年選南京吏部驗封司主事歷遷郎中吏在
司者莫不懷其恩居九年冢宰鄞聞公奉新宋公皆
當世名卿咸賞識之陞江西布政司左叅議江右田
土不相懸而稅入多寡殊絕如南昌新建二縣僅百
里多山湖稅糧十六萬廣信縣六贛州縣十糧皆六
萬南安四縣糧二萬三郡二十縣之糧不及兩縣巡

撫傳都御史議均之公在糧儲道為法均派折衷最為簡易蓋國初以次削平僭偽田賦往往因其舊貫論者謂蘇州田不及淮安半而吳賦十倍淮陰松江二縣糧與畿內八府百七十縣埒其不均如此吳郡異時嘗均田而均止於一郡且破壞兩稅陰有增羨民病之不若江右之善而惜不及行也陞山東按察司副使兵備臨清先是虜薄京城又數聲言從井陘口入掠臨清臨清縮漕道商賈所湊人情惟懼公處之宴然或為公地欲移任公曰詎至於此境上屯兵數萬調度有方虜亦竟不至師尚詔反河南至五

河兵敗散獨與數騎走莘縣擒獲之在鎮三年商民稱其簡靜甌寧李尚書自吏部罷還所過頗懈慢公勞送禮有加李公甚喜歡曰李君非世人情吾因以是識其人會召還即日薦陞湖廣布政司右叅政景王封在漢東未之國詔命德安造王府公董其役又以承天脩稜恩殿陞河南按察司按察使受命四月尋擢巡撫湖廣右僉都御史奏水災乞蠲貸親行澠渚雲夢間拊循之東南用兵禦日本軍府檄至調保靖容美桑植麻寮鎮溪大刺土兵三萬二千所過牢廩無缺公因奏土司各有分守兵不可

多調且無益徒糜糧廩其後土兵還輒掠內地人口
公檄所至搜閱悉送歸鄉里 顯陵大水衝壞 二
紅門黃河便橋而故邸 龍飛慶雲宮殿多隳撓奏
加脩理建立元祐宮碑亭是時 奉天殿災 勅命
大臣開府江陵總督湖廣川貴採辦大木工部劉侍
郎方受命以憂去 上特旨陞公左副都御史代其
任先是 天子稽古制建 九廟而 西苑穆清之
居歲有興造頗寫蜀荆之材公至則近水無復峻幹
乃行巴庸蕪道轉荆岳至東南川往來督責鈞之荒
裔中於是萬山之木稍出然 帝室紫宮舊制瓌瑰

於永樂金柱圍長終不能合公奏言臣督率郎中張
國珍李佑副使張正和盧孝達各該守巡叅政游震
得副使周錦僉事于錦先後浚入永順卯峒梭梭江
叅政徐霈僉事崔都入容美副使黃宗器入施州金
峒叅政靳學顏入永寧迤東蘭州儒溪副使劉斯潔
入黎州天全建昌董榮入烏蒙叅政繆文龍入播州
真州酉陽僉事吳仲禮入永寧迤西落洪班鳩井鎮
雄程嗣功入龍州叅政張定入銅仁省溪叅議王重
光入赤水猴峒僉事顧炳入思南潮底汪集入永寧
順崖而湖廣巡撫右僉都御史趙炳然巡按御史吳

百朋各先後親歷荆岳辰常四川巡撫右副都御史
黃光昇歷叙馬重夔巡按御史郭民敬歷邛雅貴州
巡撫右副都御史高翀歷思石鎮黎巡按御史朱賢
歷永寧赤水臣自趨涪州六月上瀘叙而巨材所生
必於溪林窮壑崇岡絕箐人跡不到之地經數百年
而後至合抱又鮮不空灌昔尚書宋禮及近時尚書
樊繼祖侍郎潘鑑採得逾尋丈者數株而已今三省
見採丈圍以上楠杉二千餘丈四五以上亦一百一
十七視前亦已超絕矣第所派長巨非常故圍圓難
合臣奉命初恐搜索未徧今則深入窮搜知不可得

而先年營建亦必別有所處伏望 皇上敕下該部
計議量材取用庶臣等專心採辦而大工早集矣
上允其奏命求其次者其後木亦益出自江淮至於
京師簿筏相接而 天子猶以 皇祖時殿災後十
年始成今未六七載欲待得巨材故殿建未有期而
西工驟興漕下之木多取以爲用三省吏民暴露三
年無有休息期大臣以爲言 天子亦自憐之將作
大匠又能規削膠附極般爾之巧而見材度已足用
公懇乞興工罷採以休荆蜀民使者相望於道詞旨
甚哀而工部大臣力任其事 天子從之考卜興工

有日矣其後漕數比先所下多有奇羨凡得木一萬一千二百八十九章公上最推功於三巡撫下至小官莫不錄其勞今不載獨載其所奏兩司涉歷採取之地曰四川守巡督儒溪之木播州之木建昌天全之木鎮雄烏蒙之木龍州蘭州之木湖廣督容美之木施州之木永順卯峒之木靖州之木及督行湖南購木于九嶷荆南購木于陝西階州武昌漢陽黃州購木于施州永順貴州則於赤水猴峒思南潮底永寧順崖其南出雲南金沙江云大抵荆楚雖廣山木少採伐險遠必俟雨水而出而施州石坂亂灘迂迴

千里貴陽窮險山嶺深峭由川辰大河以達城陵磯蜀山懸隔千里排巖批谷灘急漩險經時歷月始達會河而吏民冒犯瘴毒林木蒙籠與虺蛇虎豹錯行萬人邪許摧軋崩萃鳥獸哀鳴震天岷地蓋出入百蠻之中窮南紀之地其艱如此故附著之俾後有考焉昔稱雍州南山檀栢而天水隴西多材木故叢臺阿房建章朝陽之作皆因其所有金源氏營汴新宮採青峰山巨木猶以爲漢唐之所不能致公乃獲之山童木遁之時發天地之藏助成國家億萬年之丕圖其勤至矣是歲冬微還內臺明年考察天下官

已而病作請告病益侵乞還鄉 天子許之行至東
平安山驛而薨嘉靖四十一年四月乙亥也年五十
有七仕宦二十餘年未嘗一日居家山東獲賊湖廣
營造東南平倭累有白金文綺之賜而提督採運之
擢 旨從中下蓋 上所自簡也祖考妣皆受 誥
贈母杜氏封太淑人所之官必迎養世以爲榮公事
太淑人孝謹每巡行日遣人問安還輒拜堂下太淑
人茹素公蹠以請者數太淑人不得已爲之進羞膳
平生未嘗言人過其所敬愛與之甚親至其所不屑
然亦無所假借在江陵有所使吏遲至公問其故言

方食市肆中又無馬騎故事臺所使吏廩食與馬爲
荊州奪之公曰彼少年欲立名耳竟不復問周太僕
還自滇南公不出候蓋不知也周公鄉里前輩以禮
相責誚公置酒仲宣樓深自遜謝而已爲人美姿容
自少衣服鮮好及貴益稱其志至京師大學士嚴公
迎謂之曰公不獨才望逾人丰采亦足羽儀朝廷矣
所居官廉潔不苛採辦銀魚慮數百萬先時堆積堂
中公絕不使入臺門第貯荊州府募召商夷賞購過
當人皆懷之故總督三年地窮邊裔而民夷不驚以
是爲難是歲 奉天殿文武樓告成 上製名曰

皇極殿門曰 皇極門而西宮亦不日而就 天子
方加恩臣下叙任事者之勞績而公不逮矣娶顧氏
封淑人子男五延植國子生延節延芳延英延實縣
學生女四適孟紹顏管夢周王世訓其一尚幼孫男
七世彥官生世良世顯世達餘未名孫女六余與公
少相知諸子來請撰述因就其家得所遺文字參以
所見開稍加論次上之史館謹狀

勅封文林郎分宜縣知縣前同州判官許君行

狀

君姓許氏諱志學字遜卿其先蘇州之嘉定人諱慶

賜者為崑山魏氏館甥遂為崑山人子文衡文衡生
琮其季曰瓚琮子翊承事郎瓚子翀羽林衛經歷平
定州同知承事生襄 敕授登仕佐郎南京馴象所
吏目君之考也自慶賜始遷再世而有兄弟數人勤
於治生多蓄藏延禮耆儒沈同菴先生於家塾以教
諸子當是時葉文莊公張憲副和張叅政穆沈憲副
訥一時名賢皆往來其家故許氏富而子孫多衣
冠之列君少勤學強記善為文詞登仕益晚而得子
憐愛之故用貲升為太學生六館之士推讓為累舉
不第以上舍選為同州判官六年凡署州縣事五同

州夏陽臨晉郃陽徵重泉同州以守缺其餘諸縣即
令去必以君攝士大夫皆爲文紀之曰承上使下悉
有成度姦軌壹跡境內肅清不於分外徵索以阿上
官意脩黷舍勵學者此朝邑之所紀者也釐前秕政
革浮靡絕苞苴儲廩給足傳爰精明脩啓聖名宦祠
此蒲城之所紀者也今世州縣官悉簡自天朝唯
權攝則監司得自用類前世之辟舉者故或其人
稱必不以攝或少試之旋即牒去君之署篆至於四
五可以知其選矣其子給事君言今重泉臨晉間民
有肖像而拜祀者又言谿田馬公苑洛韓公皆關中

名士每見君未嘗不加敬也既解官則治亭圃於先
塋之側而居之歲時食新先以奉親然後敢嘗與人
交不設城府然不能容人過惡故亦往往寡合今有
科徭及君家君自以嘗任州縣爲七品官與爭論無
所詘令欲重困之會給事發解報至以故得免君始
爲太學生遊間及官同州沙苑登覽華山之勝甚自
樂也至爲鄉社會飲酒笑譁無虛日吳中田土沃饒
然賦稅重而俗淫侈故罕有百年富室雖爲大官家
不一二世輒敗許氏自國初至今居邑之柴巷無
改也有屋廬之美田園市肆之入又以詩書紹續及

給事君而貴顯初給事令分宜已 敕封如其官及
是人方賀君將更有加封之命而不幸已矣君卒於
嘉靖己未年六月初六日得年六十有三娶錢氏封
太孺人子男一人從龍戶科給事中女一人適張必
顯孫男一人汝愚太學生女二人曾孫男女二人某
高大父時已與君家交好見家中文字有顧惟誠許
鵬遠者鵬遠即承事君而惟誠者太保顧文康父也
高大父是以與兩家締姻而大父與登仕君又皆高
年爲社會而君與家君又同社社中君最年少癸丑
之歲給事同余北上道中聯轡嘗以登仕年老爲憂

念意獨謂君壯盛未艾也而登仕卒裁踰六年君亦
卒僅止於中壽給事是以痛恨焉亟圖所以不朽者
以予知其家世因頗采示馮翊之政俾次其大畧存
之家乘他日墓隧銘誌之文詞史館推封之制草庶
於斯有徵云



皇清文集

卷之二十一

十五

雨金堂

